

SARAJEVO Stav ambasadora Vijeća za implementaciju mira

PIC prozvao šestorku

Dok BiH stagnira u ekonomskom i političkom smislu, sve tri susjedne zemlje ostvaruju značajan napredak, navodi se u saopćenju



Ambasadori PIC-a: Poduzeti odlučne korake

Povodom godišnjice općih izbora u BiH i činjenice da građani još čekaju formiranje Vijeća ministara, jučer su se oglašili i ambasadori zemalja članica Upravnog odbora Vijeća za implementaciju mira (PIC).

Sastanak održan u Brčkom prošle sedmice pokazao je da je većina strana-

načkih čelnika spremna da poduzme konstruktivne mjere i pronade kompromis kako bi postigli dogovor koji bi omogućio formiranje novog Vijeća ministara - navodi se u saopćenju.

Konstruktivne mjere

Zbog toga Upravni odbor PIC-a poziva šestoricu stranačkih čelnika da ispune

svoju demokratsku odgovornost prema građanima BiH i postignu konačan dogovor o formiranju Vijeća ministara. Također, navode da stranački čelnici sada moraju poduzeti mjere koje su neophodne za postizanje dogovora.

- Pozivamo stranačke čelnike i postojeće institucije BiH da finaliziraju i provedu dogovore o pitanjima koja se tiču pristupanja EU, kao što su zakon o državnoj pomoći, konkretne mjere da se provede odluka Evropskog suda za ljudska prava u predmetu „Sejdić - Finci“, te zakon o popisu stanovništva - kažu u PIC-u.

Stvarni napredak

Ovo bi, poručuju, omogućilo BiH da ostvari napredak u procesu evropskih integracija. Ambasadori PIC-a poručuju da dok BiH stagnira u ekonomskom i političkom smislu, sve tri susjedne zemlje ostvaruju značajan napredak u procesu integracije u EU. Došlo je, kažu, vrijeme da i BiH poduzme odlučne korake u tom pravcu.

F. K.



Basiner: Ništa novo

Formiranje vlasti nije samo podjela fotelja

Američki analitičar Kurt Basiner (Bassuener) kaže za „Dnevni avaz“ da jučerašnje saopćenje PIC-a ne predstavlja ništa novo, već da smo se na to navikli.

- Možda sam pesimista, ali ne vidim da te stranke mogu sastaviti vladu koja će

imati zajedničku politiku o važnim pitanjima, kao što je slučaj „Sejdić - Finci“, jer o njima imaju oprečne stavove - kazao nam je Basiner, koji podsjeća da učešće u vlasti ne znači samo podjelu ministarskih mjesta.

G. M.

Performans umjetnika i udruženja građana

Imenovana alternativna vlada

Nekoliko udruženja građana iz cijele BiH jučer je u Sarajevu izvelo performans pod nazivom „Sam svoj ministar! Svi u ministre“ te oformilo „Alternativno Vijeće ministara BiH“ kako bi ukazali na neodrživost trenutnog stanja u državi.

Alen Tatić, koordinator

iz udruženja „Akcija građana“, rekao je da udruženja smatraju da sadašnja vlast nije demokratski izabrana i preporučio građanima da sljedeći put izađu iz uobičajnih glasačkih torova.

- Glasajte za bilo koga samo da do sada nije

učestvovao u vlasti - istakao je Tatić.

Damir Nikšić, konceptualni umjetnik u svojstvu alternativnog ministra kulture, rekao je da je ovo poziv, prije svega, intelektualnoj avangardi da smijeni jedan „režim nehata“. Alternativni ministri su htjeli

ući u zgradu Parlamenta BiH, ali im osiguranje i policija nisu dozvolili ni da se popnu na plato ispred zgrade, pa su bili prinuđeni da se fotografiraju na stepenicama platoa uz komentar da se s ovakvom vlašću možemo „samo slikati“.

A. C.



Stjuart: Vratit ću se

Ličnost dana Bob Stjuart

Čiste ruke!

Bivši komandant UNPROFOR-a u BiH, danas član britanskog parlamenta, pokazao da nije zaboravio Ahmiće

Povratkom u Ahmiće nakon 18 godina, bivši komandant UNPROFOR-a u BiH Bob Stjuart (Bob Stewart) pokazao je dosljednost sebi i svojim uvjerenjima te potvrdio da je sjećanje na njega kao na prijatelja ove zemlje bilo više nego opravdano.

Najviše zahvaljujući ovom komandantu, slike užasa iz Ahmića obišle su svijet. Stjuart i danas ponavlja da se u ovom selu dogodilo zločin i genocid te pokazuje spremnost da pomogne. Stjuart je ostao upamćen po tome što se na jednom sastanku odbio rukovati s vojnicima HVO-a, smatrajući ih direktno odgovornim za počinjene zločine. Do danas se nije predomi-

slio. Kaže da nije želio isprljati ruke zločincima.

Da nije zaboravio Ahmiće i BiH, Stjuart je pokazao svojom posljednjom posjetom našoj zemlji. Riječi ohrabrenja dobro su došle svima nama. No, pravi vojnici kao što je Stjuart više cijeni konkretna djela, tako da je najavio novu posjetu sljedeće godine, kada će u BiH pokušati dovesti delegacije britanskih parlamentaraca.

Robert Bob Stjuart bivši je britanski vojni oficir i komandant UNPROFOR-a. Služio je u BiH tokom 1992. i 1993. godine. Rođen je 7. jula 1949. Završio je Kraljevsku vojnu akademiju. Član je britanskog parlamenta i Konzervativne partije.

F. K.

Zločin na Korićanskim stijenama Tužilaštvo traži kaznu dugotrajnog zatvora

Pred Apelacionim vijećem Suda BiH Tužilaštvo BiH i odbrane Zorana Babića, Milorada Škrbića i Dušana Jankovića obrazložili su žalbe na prvostepenu presudu kojom su osuđeni ukupno na 71 godinu zatvora zbog zločina na Korićanskim stijenama, prenosi BIRN.

Tužilac Tužilaštva BiH Slavica Terzić izjavila je da su kazne koje je Sud BiH izrekao optuženima za zločin na

Korićanskim stijenama „preblage“ te da smatra da je Milorad Radaković, koji je pred prvostepenim Vijećem oslobođen krivice, počinio djelo za koje ga Tužilaštvo tereti.

- Prijedlog Tužilaštva je da Apelaciono vijeće izrekne kaznu dugotrajnog zatvora za Babića, Škrbića i Jankovića, a da Željku Stojniću bude izrečena kazna zatvora u dužem trajanju - rekla je Terzićeva.

Vlast u skladu s rezultatima

► Zlatko Lagumdžija, predsjednik SDP-a BiH, jučer se u Sarajevu sastao s Aleksandrom Bocan-Harčenkom, ambasadorom Ruske Federacije, javila je Fena. Predsjednik SDP-a informirao je ambasadora Harčenka o sastanku političkih lidera koji je održan u Brčkom, naglasivši da je SDP u dosadašnjem procesu, a posebno na sastanku u Brčkom, pokazao veliku spremnost na kompromis. Istaknuto je i da vlast treba biti formirana u skladu s rezultatima izbora i preciznim slovom Ustava i Zakona uz prioritarno usaglašavanje programskih načela.